

Բացի կատոից, տանեցիներից ուրիշ ոչ ոք չյայտնեցաւ: Երեխաները, երեւի, քնած էին. նրանց ձայնն անգամ չէր լսուում: Իսկ կանայք այդ կողմերում օտար տղամարդի աչքին երեւնալու սովորութիւն չունէին:

Այգեստանը արժանի էր իր կոչմանը: Քաղաքի այդ գեղեցիկ արոարձանը ծառախիտ այգիների բաւական ընդարձակ տարածութիւն է, բաժանուած լայն փողոցներով, որոնց աջ եւ ձախ կողմերում հոսում են առուակներ, հովանաւորուած ուռեւի եւ բարդի ծառերով: Դրսից տները չեն երեւում. ոչ մի լուսամուտ բացուած չէ փողոցի վրայ, բացի գլխաւոր դռնից, որ ներս է տանում դէպի բնակարանը, որ ետեւի կողմից միայն նայում է դէպի այգին կամ պարտեզը: Ամէն մի տուն կենտրոնացուած է իր մէջ, ապրում է իր նեղ առանձնական կեանքով: Վարպետ Փանոսի տունը նոյնպէս այդ ձեւն ուներ:

Սենեակը, որ որոշուած էր մեզ համար, տան երկրորդ հարկումն էր գտնուում: Բաւական կոկիկ մի սենեակ էր այդ, երեւի միայն հիւրերի համար էր պատրաստուած: Տան մէջ որքան գեղեցիկ իրեղէններ կային, իբրեւ զարդարանք, բոլորը դրուած էին այստեղ: Պատուհանների մէջ շարած էին զանազան տեսակ չինական եւ պարսկական ամաններ, ամենահին ժամանակներից մնացած, որոնց շատերը այժմ գործածութիւնից ընկել էին: Նրանց թւում կային պղնձեայ թասեր, աշտանակներ, ափսէներ եւ մեծ բոլորակ սինիներ, բոլորը գեղեցիկ քանդակներով: Կային եւ բազմաթիւ նարգիլներ ու չիբուխներ՝ երկայն ծխաքարշներով՝ յասմիկի փայտից կամ Շիրազի կեռասենուց պատրաստուած: Երեւում էր, որ այստեղ սովորութիւն կար այնքան թոով չիբուխներ ու նարգիլներ պահել իր տանը, ինչ թոով պատահած ժամանակը հիւրեր կունենային: Երեւում էին եւ զէնքեր: Պատերից քարշ էին ընկած զանազան տեսակ պատերազմական գործիքներ, սկսեալ հնադարեան երկաթեայ տապարներից, վահաններից, սաղաւարտներից եւ զրահներից մինչեւ նոր ժամանակների երկայն նիզակները, դարաքինաները, ատրճանակները եւ հրացանները: Դրանց թւում պատերից քարշ էին ընկած տեղային զանազան նոսազարաններ՝ սազ, սանթուր, չոնգուր, սրինգ, դափ, թմբուկ եւ այլն: Երեւում էր, որ տանտերը ածել եւս գիտեր, կամ դրանք պահուում էին հիւրերի համար: Այդ բոլոր զարդարանքները լրացնում էին մի քանի պատկերներ, որոնք, ինչպէս թւում էր ինձ, հին դարերի գործ պէտք է լինէին: Արդեօք ո՞ւմ պատկերներն էին, ես հասկանալ չկարողացայ, շատ հաւանական էր, որ թաղաւորների, իշխանների պատկերներ լինէին, գոնէ այդպէս էին ցոյց տալիս նրանց թէ զգեստաւորութիւնը եւ թէ զէնքերը, որոնք բոլորը հին ժամանակներին էին պատկանում: Այստեղ ու այնտեղ փունջերով դրած էին չորացրած ծաղիկներ, որոնց մէջ իր գեղեցկութեամբ առաջին տեղը բռ-